

白氏長慶集



白氏文集卷第五十三

中書制誥六

新體凡四十八首

鎮州軍將王怡判官李序先被賊中誅囚並死
各贈官及優恤子孫制

武寧軍陣亡大將軍李自明贈濠州刺史制

裴弘泰可太府少卿知左藏庫出納制

李昌元可兼御史大夫制

田穎可亳州刺史制

薛伯高等亡母追贈郡夫人制

李佑授晉州刺史制

武寧軍將王昌涉等授官制

馬摠亡祖母韋氏贈夫人制

路貫等授桂州判官制

駙馬都尉鄭何除右衛將軍制

封太和長公主制

宋朝榮加常侍制

贈陣亡軍將等刺史制

諸道軍將等授官制

裴度韓弘等各賜一子官并授姪女婿等制

入迴紇使下軍將官吏夏侯仕戡等四十人授

卿監賓客諮議衛佐同制

盧昂可監察御史裏行知轉運永豐院制

王播

奏請

張惟素亡祖絃贈戶部郎中制

興州刺史鄭公遠授王府長史李循授興州

刺史同制

權知陵州刺史李正卿正除刺史制

知渭橋院官蘇洎授員外郎依前職前進士王績授校書郎江西巡官制

湖南都押衙監察御史王瓘可郴州司馬依舊職制

安南告捷軍將黃士僚授銀青光祿大夫試殿中監制

王鎰可刑部員外郎制

京兆府司錄叅軍孫簡可檢校禮部員外郎荆南節度判官浙東判官試大理評事韓欽可殿中侍御史巡官試正字晁朴可試協律郎充推官同制

冀州奏事官田練可冀州司馬兼殿中侍御史制薛常颺可邢州刺史本州團練使制

牛元翼可檢校左散騎常侍深州刺史御史大夫制

王衆仲可衡州刺史制

田盛可金吾將軍勾當左街事制

陳楚男王府諮議叅軍君賞可定州長史兼御史

史軍中駢使制

崔承寵可集州刺史

前貝州刺史崔鴻可重授貝州刺史制

前吉州刺史李繁可依前吉州刺史制

瀛漠州都虞候萬重皓可坊州司馬制

崔墉可河南府法曹參軍制

前河陽節度使魏義通授右龍武軍統軍前

泗州刺史李進賢授右驍衛將軍並檢校

常侍兼御史大夫制

李玄成等授官制

馬摠准制追贈亡父請追贈亡祖制

權知朔州刺史樂璘正授兼御史中丞制

神策軍推官田鑄加官制

裴敞授昭義軍判官裴侔授義成軍判官各轉官制

雲州刺史高榮朝除太子賓客河東都押衙制

韋綬等賜爵制

烏重明等贈官制

羽林龍武等軍將士各加轉制

新羅賀正使金良忠等授官歸國制

鎮州軍將王怡判官李序先被賊中誅囚並死各贈

官及優卹子孫制

勅朕常思建國異之間弔伐之際有仗順死義不吾聞者因命弘
正列狀以聞而某官王怡等頃陷艱虞思伸忠効或名節將立
併命於幽憂或義烈臨奮失身於戮辱履危如武尾視死如
鴻毛若無褒揚何勸天下既降飾終之命仍加身後之禮追榮延
寵有越常倫冀使死節之魂忠憤之骨知我憐憫歿無恨焉怡
可贈左僕射序可贈給事中

武寧軍陣亡大將軍李自明贈濠州刺史制

勅王師之討蔡平鄆也自明爲武寧裨將隸于元戎凡所指蹤必
先致命三軍之士于今稱之有勞未圖無祿早代生不及賞歿而
加恩庶使猛將義夫聞而相勸曰死猶不忘況生者乎可贈濠
州刺史

裴弘泰可太府少卿知左藏庫出納制

勅前度支河北權鹽使朝議郎檢校尚書刑部郎中使持節貝

州諸軍事兼權知貝州刺史侍御史充本州防禦使上柱國
賜紫金魚袋裴弘泰九土之貢百品之貨辨其名物謹其出納
常在外府統以上卿宜求幹敏之才以爲之貳而弘泰領分推
務兼撫郡民當軍興之時法行政立則受藏之府事繁物
殷量其器能可以專委勉膺是任無替前勞可守太府少卿知
左藏庫出納散官勲賜如故

李昌元可兼御史大夫制

勅通議大夫使持節儀州諸軍事儀州刺史兼御史中丞上柱
國李昌元弓裘令子疆場勞臣能讀父書甚識戎事每在戰
陣未嘗無功及委蕃條亦聞有政而知臣者君也賞勞者爵也
臣相之秩威重寵崇加乎尔身以勸能者可兼御史大夫餘數
田頴可充州刺史制

勅正議大夫前檢校右散騎常侍使持節洛州諸軍事兼洛州

刺史御史大夫充本州團練使上柱國賜紫金魚袋田頌自別屯將壘專領郡城而能勤恤師人與之勞逸故臨戎則士樂爲用撫下而衆知嚮方忠勲既彰能政亦著牧守之選吾所重之譙鄴之間人亦勞止授尔印綬往勞來之宜推前心佇立後効可檢校左散騎常侍使持節亳州諸軍事兼亳州刺史御史大夫本州團練使鎮遏使散官勲賜如故

薛伯高等云母追贈郡夫人制

勅某夫人某氏等始提婦儀終垂母道教其令子爲我良臣而皆茂著才名榮居爵位永言聖善宜及顯揚俾追啓邑之封式表統家之訓可依前件

李佑授晉州刺史制

勅牧守之官與吾共理下之安否繫乎其人必稽前功方降是命某官李佑夙負幹器累經任用當領軍郡頗著政聲而

平陽舊都近罷征鎮土疆事物既廣且夥藉尔良能爲子撫字夫均其征役簡其科禁謹身省事以臨其人而人不安未之有也往弘是道以康晉人可依前件

武寧軍將王昌涉等授官制

勅王昌涉等早以材力召募從軍元和已來南征北伐咸有勞績著于一時主帥上聞乞加褒賞故以寺卿憲職序而寵之無弃前功在申後効可依前件

馬惣亡祖母韋氏贈夫人制

勅某官馬惣亡祖母韋氏播茲懿範貽厥嘉謀施及孝孫實居貴任將明餘慶其在追榮不唯垂裕後昆抑亦光昭幽壤宜降封丘之命以慰令伯之心可贈某夫人

路貫等授桂州判官制

勅藩隅之重委以侯伯軍府之要掌在賓寮貫等以文行

修身以智謀從事佐廉問澄清之務撫華夷錯雜之人俾其
又安實在參贊宜及寵命以光所從可依前件

駙馬都尉鄭何除右衛將軍制

勅周設七萃漢列八屯皆以拱衛王宮肅嚴徽道統茲駢
吏其屬親賢某官鄭何擢秀士林挺質公器以貞和陶其
性以禮樂文其身善積德門慶連戚里況久踐名職累著聲
猷念舊獎能宜加榮寵環列之尹不易其人俾宣力於爪牙
不失親於肺腑可右衛將軍餘如故

封太和長公主制

勅公主之封号也或以善地或以嘉名立愛展親茲惟舊典
第四女端明成性和順稟教靜無違禮故組紉有常訓勳必
中節故環珮有常聲歲茂穠華日新淑問乃眷肅雍之
德俾開湯沐之封可封某公主

宋朝榮加常侍制

勅河東節度都押衙試太子賓客兼御史中丞宋朝榮嘗因戰功擢領邊郡揆能適用故有轉遷龍樓上客牙門右職雖有兼命未表殊恩宜加騎省之榮不改憲臺之重以茲寵任足報忠勲爾其敬承無墮乃力可檢校左散騎常侍餘如故

贈陣亡軍將等刺史制

勅故某官某等主師問罪至于淄青爾等同執干戈親當矢石忠而盡瘁勇以亡身或退卒于師或進歿于戰俱死王事深慟朕心念捐軀於軍前宜追命於泉下郡守之貴以宗褒榮可依前件諸道軍將等授官制

勅平齊之役也諸軍指期衆校合戰某官等各輸戮勇同樹勲勤永思積日之勞頗愧踰時之賞故於獎授有所超遷朝右貴班官坊清秩或參憲職分以命之庶知我心不忘忠力可依前件

裴度韓弘等各賜一子官并授姪女壻等制

勅某官某等謁廟郊天改元肆眚是爲大慶與衆共之矧股肱
心膂之臣與吾同體延賞任子其可廢乎爾等或以文華或以吏
職有所修立稟於義方自當發升況霑慶澤俾舉展親之典
用叶推恩之道猶子愛壻各命以官爾其勗承無忝朝獎可依
前件

入迴紇使下軍將官吏夏侯仕戡等四十人授卿

監賓客諮議衛佐同制

勅某官夏侯仕戡等前命鄭權之入迴紇也爾等參護使車
用祇王命悉心盡力有恪恭跋滯之勤焉宜以省寺軍衛之班官
坊府邸之列舉爲賓典分以寵之辨等旌勞於是乎在可依前件

盧昂可監察御史裏行知轉運永曲且院制

王審
奏請

勅號州司戶參軍盧昂前負瑕疵事多曖昧今聞修省善亦

昭彰況有大僚同知情狀且明非罪仍舉有才吾信人言遂可其奏尔思自効無辱所知可依前件

張惟素亡祖紘贈戶部郎中制

勅右散騎常侍張惟素亡祖某縣令某德合上玄才終下位命屈於當代慶流於後昆故其孝孫實登貴仕經曰無念尔祖詩曰貽厥孫謀此言孫之謀能顯揚其先祖之德能垂裕于後也不追榮於列宿曷旌精德於太丘可贈戶部郎中

興州刺史鄭公達授王府長史李雍授興州刺史同制
勅鄭公達等或以行稱或以才舉進修所致班秩不卑改命序遷各適其用且乘朱輪於郡邛曳長裾於王門士子名宦至斯亦不為不遇也立朝案部各敬尔官可依前件

權知陵州刺史李正卿正除刺史制

勅審材之要考察為先吾是於人試可乃用李正卿頗闢吏道因

假郡符畏法愛人善於其職夫速旌其能則吏勸久於其政則化成未可轉遷就加真秩副吾知將矣無怠始終可陵州刺史

知渭橋院官蘇洎授員外郎依前職前進士王績授校書郎江西巡官制

勅某官蘇洎嘗以幹良分領劇務受任稱職主者上聞績既有成賞安可闕前進士王績亦以藝學籍名太常著其令聞及此慰薦以課進一以才升咸加班榮同以褒獎臺官校職尔各欽承可依前件

湖南都押衙監察御史王瓘可郴州司馬依舊職制勅某官王瓘郡司馬之官秩祿頗厚凡在戎行有軍課者多兼命以優寵焉而瓘以鞭弭橐鞬從事征鎮前後主帥咸稱有功宜加新命仍率舊職蓋欲旌往勞而責來効也尔其勉之可兼郴州司馬

安南告捷軍將黃士係授銀青光祿大夫試殿中監制勅某官黃士係戎首來降陪臣告捷服勤靡監將命無違宜以恩榮獎其勞效貴階崇秩兼而寵之可依前件

王鑑可刑部員外郎制

勅刑曹郎黻朕詔執事擇可以善於其職者而殿中侍御史王鑑自居殿中能察非法連鞠庶獄多叶平允加以溫敏靜專可當是選一歲之獄決在秋冬今方其時宜勗乃職

京兆府司錄參軍孫簡可檢校禮部員外郎荆南節度判官浙東判官試大理評事韓欽可殿中侍御史巡官試正字晁朴可試協律郎充推官同制

勅某官孫簡等凡使府之制量職之輕重以命官揆時之遠近以進秩俾等襄有常序遷次有常程勞逸均而名分定矣簡自登憲司佐相幕府暨糾天府皆有可稱而欽等亦以文學發身

謀畫効用荆陽浙右實籍賓寮況今之公卿大夫皆由此塗出
慎尔職事尔無自輕可依前件

冀州奏事官田練可冀州司馬兼殿中侍御史制

勅某官田練幹敏立身公勤濟事奉州將之手疏達軍人之血
誠念其忠勞宜有寵擢假憲名於殿內遷郡秩於治中茲謂兼
榮尔其敬受可依前件

薛常颺可邢州刺史本州團練使制

勅新授深州刺史薛常颺平蔡之役常領偏師實立勲勞遂
膺寵任今屬方隅多故將守用能且以颺之長材居邢之要地故
命魚符換郡能載移轅轅夫事至而功成時來而節見此忠良之
事業也尔其念之哉可依前件

牛元翼可檢校左散騎常侍深州刺史御史大夫制

勅某官兼御史中丞權知深州事牛元翼命官之要凡試吏者必